

Fasnacht 2018

Will si z' Bärn die Hunde-Kurs-Pflicht abgeschafft hänn
miemmer nimm folge, mache wieder was mr wänn
jetz goht d' Boscht ab, mr kenne uns vo dr Laine rysse
und im verby go em Böschtlar in d' Waade bysse.

Mr singe gärn Schnitzelbängg und hänn Spass
laufe ass Bäffzgi amme dur d' Fasnachtsgass
aber s' hett e Noochschmagg zimmlig e fahle
ass mr fir die drey Dääg no mien Hundestyyr zahle.

Alli Ysbäre sinn absegglet, was hesch was gisch
wo Doris Leuthard in Grönland uff em Ys gschtande isch
wäg ihrem Allwätter-Mantel und ihrem Charme däm stolze
isch hinder ihre grad en Ysbärg gschmolze.

Alli Rächnige vo minere Kosmetik, Zahnarzt und vom Gwafför
erledigt mi Maa, au die vom Schönheitschirurg und em Massör
nur machts mi verruggt, denn är heftet die Rächnige ganz stur
immer in Ordner fir Sanierig, Umbau und Reparatur.

Wo do dr Fringer Ohrefyygli bykunnt und e Gingg an d' Wade
sait d' Frau Constantin zem Maa: «Hör jetz uff mit däne Eskapade,
es isch immer nur dr Alkohol tschuld do bi dir!»
denn maint är: «No bi'n'y aber froh, ha gmaint s'liggt an mir».

Eso'ne Klatsch uff d' Bagge bis es bläuelet und grient
ha'n'y dänggt, däm sy Gesicht het doch e Applaus verdient.

Mr kemme wohrschynlig nit drumumme
und zahle halt die Hundestyyr, mir Dumme
aber s' Schlimmschte isch no, jetz wänn die Fräche
uns no'ne Hunde-Chip in d' Larve stäche.

E Wahnsinn, was an däm Black Friday in dr Stadt so lauft
y ha denn au grad e Kaffi-Automat fir e Lappe kauft
mr hänn zwar scho Fimf in dr Kuchi stoh
aber no kai soo Ginschtigi, das Schnäppli ha mr nit lo entgooh.

Die neje Neetli sinn jo OK, aber wie gsait
friehner hani als vyyyl mee Waar uss de Lääde draht
aber hitt gitts nimm vyyyl, denn muesch bedängge
ass efang iiberall so liberwachigs-Kameras hängge.

Mi Doggter hett gsait, y sell Sport dryybe, dä hett mr gfalle
jetz spiel y halt ganz vergiftet Tennis, in dr Halle
und y hoff schwer, y bi jo nit blöd und nit dumm
ass y denn au bald dr Doggter-Titel bykumm.

Es kryselet bi dr Bolizey, und e Krise in dr Baudep.-Fiehrig
jo iiberhaupt herrscht e Krise in dr ganze Regierig
zem Gligg isch jetz s' Bethli Ackermää doo
denn mit Däre hett die Krise s' passende Gesicht bykoo.

Wo'n'y die Blaggedde gsee ha, hett's mr fascht ebbis gäh
no ha mr iiberlait, sell y jetz trotzdäm Aini näh
denn wenn y se aalueg muess y jedesmol gähne
s' hett fascht glych vyl Figure druff wie im Stücki ääne.

www.bäffzgi.ch

Wotsch au by uns bänggle?
Uff www.vsg-basel.ch erfahrsch meh!



Fasnacht 2018



Mir zwai – mir sin zwai Pfadibuebe und sinn allzyt bereit
und mir vollbringe alli Daag e gueti Tat zu zwait
Am Züri-Flughafe – hän mir drum – d'Airforce One bewacht
Damit mir gseen – dass dä Trump – wieder verduftet und e Abflug macht.

Die Junge dien immer mee – uff ihri Smartphone stiere
Und wenn's ewäg nimmsch – meinsch de duesch – s'Hirni amputiere
Uff de Spiilblätz – gitts Gummimatte – als Verletzigschutz bim Falle
Wenn die fette Kinder würde – voll uff's Handy knalle

D'Integration in Basel – das klappt jo scho rächt guet
Z'Nacht am 12i im Glaibasel – ok das bruucht scho muet
Die Usland-Politik – grootet langsam – usser Rand und Band
Sit neuschtem isch – Züri sogar – e sichers Härkuntfstand

Dr Constatin und dr Fringer – hän sich zun'ere Ussprooch droffe
Bi däre Ussprooch – hän si denn – aine zämme gsoofe
Bim Fondue ässe – hett's für uns – usgsee nömeduure
Wie - i hau dr in Zuekunft halt – fründschafftlig ains uff d'Schnurre

Si – die Migros Wichtel – die sin denn scho dr Hit
Uns isch klar – dass es die – in Wiirggligkeit gar nid git
Und dorum regts mi schambar uff – s'isch jo nid zum saage
Luegi doch – immer an dr Kasse – in das bleede Fänschterli abe

Dr EU-Rettigsschirm – isch für Länder in finanzieller Not
Do hilft me enand – bis so e Land – wieder sälber stoot
D'Brite sin – do nümme drby – die mien denn nid ko winsle
Denn legt halt dr Charles – sini Ohre – schützend über d'Insie

Wenn e Sturm wie Burglind stürmt – do kasch denn nid guet pfuuse
S'Guete – alles wo nümme wotsch – stellsch uff e Balkon use
Won i am Morge – uffgstande bi – mach i denn dr Tescht
Alles isch wäg – usser d'Frau – die hebt sich no am Gländer fescht

Dr Donald Trump sait im Interview – und das sehr verbitteret
Amerika hett e grosses Problem – hett är denn grad twitteret
Es gitt bi däne – sehr viel psychisch Gstörrti – jo das sig dr Trend
Es isch nur sälte – dass dr Patiänt - das grad no sälber erkennt

Mach das nid und mach säll nid – duet s'Comité vorschriibe
Das isch dr Raahme für dini Fasnacht – und due jo nid übertriibe
D'Tierschützer saage – d'Rösser finde – die Fasnacht au nid glatt
Jä nu denn findet d'Fasnacht halt – ohni die Ackermaa statt

Uff T-Shirt, uff Rägeschirm, uff Mäppli, uff Däsche
Uff Gummistiifel, uff Portmonnaie und sogar uff Fläsche
Uff allem hets – so Eihörner druff – bis jetz hett me no nie ains gfunde
Uns zwai gitts in Wiirggligkeit – und nur s'Horn isch e biz witter unde.

Glyphosat isch umstritte – und s'isch kräbberregend
Es macht nämligg alles kaputt – in dr ganze Gegend
Nur die wo's – wänn verkaufe – findes halt no prima
Aber s'isch wie – d'Martullo Blocher – beidi vergifte s'Klima.

Wotsch au by uns bänggle?
Uff www.vsg-basel.ch erfahrsch meh!



Fasnacht 2018



Ich stand in d Muttenzerkurve wenn ich Rummel will
Will ich Basler seh gang ich uf Weil dert hogge viel
zum Schmuse gang ich in e Club für Swingerli
und zum einsam sii ins Läufelfingerli

Als Blageeri, sie do schaff ich gärn
An Ruhestand z dängge liggt mir färn
Im Vertraue gsait ich kaas eych saage
I mues Schaffe bismi ufs Hörnli traage

Bi so Naturkatastrophe ha mi gfroggt?
Zeigt dr Petrus em Trump, wo Gott wirklich hoggt
Ich weiss wo Gott hoggt, wänn mr wette?
Momentan bi mir dehei am Glette

Ihri Laischtig isch sie, duet nit aggere
Wenn d Ackermaa schwätzt duet die nur gaggere
Ich als Bänggler, ich loh nit lugg
und wunsch mir dr Guy Morin zrugg

In dr EU isch bald fertig mit Grossbritannia
Katalonie will wägg vo Mamma Spania
Vo mir us, ich saag eych, ich wär parat
Machet us em Glaibasel schnäll e aigene Staat

Ich mach Hochsprung, Witsprung und Triathlon
Ich gump, ich spring trainier au Marathon
Ich will nit an d Olypiaade fliege
aber s nägtscht Drämml muess ich Gopferdeggel kriege

Alles mues politisch korräggt sie, ich sag Gopf
Eiwissschum mit Schoggihuube, statt Moorekopf
Meitlbei dörfsch nüm saage, ich bi greizt
sag ich halt «Haselnuss Gebäck starggespreizt»

Oberholzer Susann und Pegoraro Sabine
Klääbe scho ewig ufem Sässel, so duet das schiine
Wurum hett no kaine KESB informiert
Die gheere doch scho lang Zwangsplaziert

Basel tiggt anderschd do druff sinn mir stolz
Mir Bebbi sinn eifach us bsunderem Holz
aber wenn mr dr Wessels nit bald in d'Wieschti schigge
Heert Basel näggschtens ganz uf tigge

Z Baasel isch e Schwoobezug us de Gleis usegsprunge
Wurum? Das isch jetzt duuredrunge
Dr Grund isch klar, ich kas dir verzelle
Das Zügli het nit nach Züüri welle

Dr Matthias Hüppi isch Präsidiänt vom FC St.Galle
Dr Alain Sutter isch dert verantwortligg fyr Druck in de Balle
Dr Sven Epiney ybernimmt s' Catering, so viel ich weiss
So bliebe schiints die Würschtl immer haiss

Dr Buur vo Tecknau ka nimmi mäliche und mischte
Sit Wuche scho hoggt är nämlig in dr Kische
vor em Mälche het är dere Kuhe s Utter griibe
und dass'Lisi het «metoo» uff Twitter gschiibe

Wotsch au by uns bänggle?
Uff www.vsg-basel.ch erfahrsch meh!



Fasnacht 2018



E ICE het in Basel drey Daag d Glais blockiert.
Worum hänn mir jetzt uusegfunde und grad rapportiert:
Dr Lokfierer het sich verfaare und isch nur entglait
will är brav em Navi folgt, wo's: «Bitte wenden!» haisst.

«Messieursdames, nous allons jetzt uff Franggryych ynefaare.
Avez-vous dr Passeport? Und hänn dr ebbe Waare?»
Die neu Linie isch genial, das merggsch wenn s'Billje lösich:
Jetzt mache mir's bim flotte 3er (Drämmli) au no uff französisch.

Basel het vyll alti Hüüser, das isch halt eso.
Asbescht und Dächer wo sich sängge, deert muess ebbis goo.
So Atlaschte hets überall, abstritte macht kai Sinn
doch die gröschte Dachschräde hänn die im Roothuus inn.

Dr Donald Duck schreyt und tobt, är stampft voller Wuet.
Si Gsicht wird rot und röter, jetzt lüpf'ts em grad dr Huet.
Är isch so hässig, dass är alles Züüg duet ummeschmaisse:
Är will wägem US-Trump(el) nimme Donald haisse.

Uff dr Autobahn gits neu im Shop jetz Alkohol
Sit däm Entschaid isch's uns bim Faare gar nimm richtig wohl.
Doch villicht isch Bier und Schnaps gar kai schlächte Plan:
Eso gseesch dopplet so vvyll Spuure uff dr Autobahn.

Am Samschdig kaufe mir als Schwyzer gärn in Lörrach yy.
Drum däubele die Schwoobe deert, wänn unter sich nur syy.
Mir finde das drnäbe - könne's nit verstoo:
mir hänn sii schliessligg, gopfriedstutz, fünf Daag pro Wuche doo.

An dr «Wältklass Züri» traffe sich vvyll Liichtathlete,
sie seggle deert um d'Wett, sinn fascht so schnäll wie ne Rakete.
Sie seggle nur im Kreis rundumme - ohni Sinn und Zwägg,
egal wie schnäll du segglisch, so kunnsch nie vo Züri wägg.

Uff em Fänschterbangg isch plötzligg uns're Kaktus wägg.
Und im Gaarte het's kai Gmies mee, iberall nur Drägg.
Au kaini Bliemli und kai Ungrutt, au kai Leuezaan
do sait mi Tochter: «Ibrigens – ych iss jetz neu vegan»

D'SBB goht aabe – mit dr Waage-Temperatur,
sogar wenn's dusse yysig isch, do duure sinn si stur.
Sie wänn uns so dängg früscher bhalte, will uns jetzte schyynne
wenn ebbis länger hebe sott, machsch's au in Kielschrank yyne.

Dr Trump und dr Kim Jong-Un hänn beidi grossi Knöpf,
wenn sie die drugge göön d'Rakete mit Atomsprängköpf.
Jetzt stritte si wie Goofe, jede will dr Grösser ha.
Drby, das waiss doch jedi Frau, kunnt's nur uff d'Technik aa.

Es het vvyll z'wenig Huusärzt umme, das isch e Brobleem
die junge Ärzt wänn nimm so schaffe, und sinn vvyll z'bequem.
Drum gang ich neu zum Tierarzt, dä ka das schliessligg au,
denn mi Frau sait sowieso: «Benimmsch di wie ne Sau!»


Heugumper, Grille, Würmli ässe kasch jetzt offiziell.
Das Ganze sinn mir noonig gwohnt, das isch sehr speziell.
Do sait sich's Anni vo dr Metzger: «Do bin ich gar nit muff:
Jetz ka-n-i madigs Fleisch verkaufe, und mit Uffbryys druff!»

«Für d'Metzger kennt's nit besser syy
Jetz laufft dr s'Flaisch grad hindedryy.....»

Wotsch au by uns bänggle?
Uff www.vsg-basel.ch erfahrsch meh!



Fasnacht 2018



30 Joor Nachtschwärmer

Vor 30 Joor, s'isch lang verbyy
Sind mir wyt und brait die scheenschte gsyy
30 Joor sind schnäll verbyy, das het me uns so gsait
Mir sind jetzte nüm die scheenschte, halt nur no wyt und brait

S'git Spinner wie dr Erdogan
Dr Kim Jong-un het Grössewaan
Denn gits au no dr Donald Trump, däa weiss sich nid z'benää
Mir Schwizer händ scho eher Gilgg, händ nur dr Constantää

Mit eme App, e Klick, oder zwai
Erledigsch allerlei, fascht von elai
Ob Pizza bschtelle, Parggblatz zaale, hit macht me das esoo
Es wär so scheen mit nur aim Klick, dr Wessels verschwinde loo

Hey Oversize, i bi unterliquidiert
Bruuch Stoff, wo mi Body wieder hydriert
Uns Alte isch die Sprooch scho fremd, so schnuure fangs e Huffe
Vor 30 Joor het das no gheisse: Hösch Digge, Duurscht, will Bier suffe

Mit E-Bikes, das isch unverdräaglig
Gits schweeri Unfäll, meermols däaglig
Lääbensföörilig isch das Zigs, do han i mir no dänggt
Kurzentschlosse so e E-Bike dr Schwiigermueter gschänggt

Hitzdaag gheerts zem guete Betraage
Wörter wie Moorekopf nimmi z'saage
Kasch nimmi schnuure wie de wotsch, es heisst denn schnäll: mei mei
Uns isch das Ganzi nid so neu, mir kenne das vo dehei

Vor 30 Joor, wenn me dänggt
Het dr Loon fir d'Kranggekasse glänggt
30 Joor sind jetz verbyy, jetz simmer halt scho alt
Immerhin, do simmer froo, länggts fir dr Sälschtbehalt

Elftausigjumperegässli iberstoo
An dr Hammerstrooss, Im Lange Loh
Im Wild-Maa-Gässli e Margarethe-Stich zwische dr Schönbeistrooss
kunnst Duu
Am Nonnewäg goot Blääsi – ring, scho isch Basel au #MeToo

Uf RTL geesch, gfilmt uf Inse
Straffi Brüsch, und schlaffi Pinsle
Mir händ die Sändig aimol gluegt, do hets uns hindere gsträält
So kunnts halt uuse, ooni Billag, wenn s'Gäld fir Kleider fäält

Wotsch au by uns bänggle?
Uff www.vsg-basel.ch erfahrsch meh!





Schnapsbagge (VSG) 2018 - Zeedel

Bi uns im Gschäft gilt ych als Loser, denn mi Power Degradation isch fatal
dr Team-Leader hett au gmaint, mi Working Speed, sig minimal
Denn bin ych am Age Upper Limit, i weiss nit, öb ych's no pagg,
Fir mini Kollege bin i e Low Performer, uff guet Dytsch gsait: E alte Sagg.

Är hett e schlanggi Form, e klassisches Design und e optimali Kapazität,
e super Abzug, e geniali Lüftig, dr Filter hebt johrelang - e fantastisch Grät.
Denn isch är no sälscht-rainigend, dä putzt sich sälber, bis uff s'letschte Körnli
Ihr wärdet ihn erlääbe - dr neu Verbrennigs-Oofe uff em Hörnli.

Dr Luan sait zer Malea: "Lueg, wie d'Yarin und dr Jodis strahle,
und wie dr Silas, d'Robea und dr Seya mit ihre Nämme prahle."
Denn git's dr Liam, dr Jerun, d'Enea, das muesch alles kenne bhalte,
und sag ych: "I bi dr Fritz", haissts: "Ey, voll strange isch di Name, Alte!"

Ych bi letschhi z'Dytschland gsi, und ha laider e weeneli z'vil drungge,
ych bi fremd gange, ha mit "Bäll" gspielt und bi imene Sündepfuhl versungge.
Jetzt han ych e Riiseschiss, dass es mi Frau erfahrt - es goht mir richtig mies,
Denn d'Schwoobe kenne bi Ballspiel jo jetzt dr Video-Bewiis.

Bim Uffstoh git's e Mutzeli, e Schämpis-Zmorge und e Massägli, ganz gepflägg
e Schwümml, e Aperöli und denne s'Gourmet-Menü - ja, das fägt.
Vo de mindere Lyt bin i abgschottet, s'gemaine Volgg wurd i nit eschtimiere.
Mi Naame isch Burckhardt - ych loss im Merian-Iseli vom Doggter Federer s'Gneu operiere.

Wenn si in gwisse Etablissements, im Glaibasel, tien Fyyroobe mache
denn gän sich d'Gescht dusse amme uff e Grind, wie nit ganz bache.
Letschthi lauf i an so e Brätscherey aane und wo i mittsdrin will interveniere,
rieft mir dr Christian Constantin: "Salü, mon vieux, ych bi am trainiere!"

Stellet euch vor, dr Bernhard Heusler hätt friehner wie dä Constantin pöblet
und denn hätt är - nämme mir aa - dr Alain Sutter vermöblet.
Do hätte doch alli g'schraue: "Es isch e wohri Pracht,
Herr Heusler, sie hän, aimol meh, alles richtig gmacht!"

Bim Lädele uff de Champs Elysées beobacht ych e Bueb, so e glaine Wurm
dä däubelet und zwängelet und macht si Grossmueter füdlesturm.
Wo ich denn neecher aanelueg, mergg ych's uff's Mol - wow:
Das isch jo dr Président Macron und die Grossmueter isch si Frau.

Ych ha vor mir aabegluegt und ha wäg em Drummeli s'Pfyfferli nimmi gseh
"Das isch wäg em Fasnachtskiechli", sait Mini am Zofiger Konzärtli, "iss nur no meh!"
S'Pfyfferli hangt wie e verwelggts Mimösli, i will's mit em Fasnachtsbändeli uffebinde
Mi Frau: "Heer uff mit däm Charivari, ych tue das total Ridicule finde".

My Frau isch syt ere Wuche vermisst, kai Ahnig, wie mi Lääbe sell witergoh,
sie isch numme mit em Hund go laufe und isch nimmi haimeko.
Jetzt han ych e Belohnig ussgsetzt und wenn's epperem g'lingt,
griegt dä finfdausig Stutz, wo mir dr Hund wieder bringt.